

H A R A N G V E

FAITE AV PARLEMENT

à la presentation des Lettres de
prouision de Monseigneur

le Garde des Seaux

de France.



A P A R I S,

Chez Rolin T H I E R R Y, rue Saint
Iacques, au Soleil d'or.

1 6 0 5.

Avec Permission.

Handwritten signature or flourish.

THE NEWBERRY
LIBRARY

Case
F
39
326


THE NEWBERRY
LIBRARY

1605 mo



A P R E S Q V E L E C T U R E
a esté faicte au Parlement, l'audience tenant,
des Lettres de prouision de Monseigneur
le Garde des Seaux de France: Il

Me Iean de Montereul *Advocat audit*
Parlement à dict.



ESSIEURS, Il a pleu au Roy hon-
 norer Messire Nicolas Brulart,
 Cheualier seigneur de Sillery Con-
 seiller en son Conseil d'Etat &
 Priué de l'office de Garde des
 Seaux de France: charge grande & honorable à la
 verité, elle a les mesmes droicts & priuileges que
 celle de Chancelier, qui est le comble des dignitez
 de ce Royaume, il n'y a rien au dessus. Ce neant-
 moins il se tient plus honoré du choix que le Roy
 à faict de sa personne, que de l'office d'ot il l'a pour-
 ueu. L'honneur de ceste charge est tresgrand en soy:
 mais la receuoir de la main d'un si grand Roy & en
 estre iugé digne par luy, sans y estre porté d'ailleurs,
 cela surpasse tous les honneurs du monde, il y a en
 ce iugement & en ce choix beaucoup plus d'hon-
 neur & de dignité, qu'en la dignité mesme. Car
 c'est le iugement d'un Prince qui n'eut iamais son

semblable, Prince auquel on ne sçait ce que l'on
 doit plus admirer, ou la vaillance & prouesse à re-
 stablir son estat, ou la prudence & sagesse à le con-
 seruer. Chose qui raiuit vn chacun & le transporte
 hors de soy-mesme quand l'on entre en comparai-
 son de la prosperité presente avec la calamité pas-
 sée. Nous auons veu ce Royaume si troublé & si
 diuisé que rien plus; Nous l'auons veu plein de
 meurtre & de sang, vne extreme desolation par
 tout, Il sembloit que le feu allumé par toute la
 France ne se pouuoit esteindre que par sa ruine v-
 niuerselle, & par l'extinction du nom François. La
 France autresfois tant florissante s'en alloit la proye
 des estrangers, si le Roy ne s'y fust opposé d'un cou-
 rage inuincible. Et comme vne ame forte & vigou-
 reuse sçait faire son profit de ses afflictions, & bien
 souuent assied sur ses propres ruines le fondement
 de sa grandeur: ces desordres ne furent au Roy
 qu'un champ de gloire & de triomphe, où la mois-
 son se trouua belle & grande pour exercer sa vertu.
 On le veid lors à la teste de son armée terrassant &
 foudroyant ses ennemis, seruy des siens, plus pour
 reuerence de sa vertu, que pour crainte de son au-
 torité: autant suiuy comme tres-vaillant Capitai-
 ne, que recogneu comme Roy legitime. Si que ses
 ennemis battus & chassés de toutes parts furent
 contraints recercher en sa clemence la protection
 & seureté, qu'ils n'auoient peu trouuer en leurs ar-
 mes: ils le trouuerent aussi debonnaire & doux en
 sa victoire qu'ils l'auoient esprouué terrible & ef-
 pouuantable au combat. Cœur genereux & vraye-
 ment Royal! il a mieux aimé pardonner à ses enne-

mis, qu'il pouuoit perdre : que les perdre, leur pou-
uant pardonner. Il a donné la vie à ceux qui la luy
vouloient oster : il a octroyé des honneurs à ceux
qui luy vouloient rauer sa Couronne, & les a mis en
tel degré d'heur & de felicité qu'aujourd'huy les vi-
ctorieux portent enuie aux vaincuz ; certes voila
vne clemence & generosité incomparable, aussi
Dieu l'a guerdonnée du plus grand heur qui se puis-
se imaginer ; car il a estably le regne du Roy dedans
le cœur de ses subiects. Ces choses apporterent vn
tel estonnement aux ennemis estrangers, que plus-
tost pour retrancher au Roy le subiect de sa gloire
& soustraire la matiere à ses trophées, que pour af-
fection qu'ils eussent au repos des peuples travail-
lez par la guerre, ils parlerent de paix : elle fut con-
clue & arrestée. Ils passeuroient que ceste paix au
dehors rameneroit & rallumeroit la guerre au de-
dans du Royaume, & que nous retomberions in-
continent en noz premieres diuisions. Ils n'auoient
reconnu au Roy que ceste tres-grande suffisance
militaire dôt la renommée a remply toute la terre
habitable. Ils ne croyoient pas qu'un Prince né,
nourry, & esleué au milieu des armées & qui toute
sa vie n'auoit manié que les armes, peut reordon-
ner vn Royaume si diuisé & si plein de partialitez.
Comme à la verité c'estoit le chef-d'œuvre d'un
Prince parfaictement sage. Mais contre leur atten-
te le voila tout soudain de Capitaine conquerant
devenu Roy pacifique, autant aymé & obey de ses
subiects, que craint & redouté de ses ennemis : de
maniere que nous recueillons aujourdhuy le fruit
de ses travaux, & ce que les plus sages & plus clair-

voyas disoiēt qu'il falloit plustost fouhaitter, qu'esperer : ce que noz esperances, qui ordinairement n'ont point de bornes, desespéroient pouuoir arriuer, nous le voyons, nous le goustōs & en iouysons plainement. Il y a plus de cent ans que la France ne s'est veüe vne paix si pleine & si entiere que celle, laquelle par la grace de Dieu le Roy luy a acquise & luy conserue avec vne vigilance incroyable. Enquoy est admirable l'amour qu'il porte à son peuple, duquel il prefere le bien & le repos à son propre contentement. Il se violente soy-mesme & va comme trahissant la gloire qui luy est preparée par les armes comme au plus grand Roy & plus grand Capitaine que le Soleil ait iamais veu. Il a de la peine à se retenir, ceste emulation qu'il a de soy-mesme & le desir de se vouloir tousiours vaincre, combatant en luy l'esperance de l'auenir avec la gloire du passé, est vn éguillon d'honneur qui le point, qui le pique, & le presse viuement. Mais l'amour de son peuple l'emporte & sert d'une forte barriere à ce violent & iuste desir. Bonté & sagesse esmerueillable ! laquelle se respand, se comunique & fait ressentir ses effects mesmes aux estrangers, qui ne donnent que trop d'occasion au Roy de leur faire la guerre. Il leur dōne la paix pour ne la point oster à son peuple. Car veulent-ils ou non, il faut malgré eux qu'ils recognoissent que nostre Roy tient en sa main la paix & la guerre, & que de luy, plus que de leurs Princes, dépend leur bonne ou mauuaise fortune. C'est pourquoy ceste bonté est assistée de celle grande fortune & faueur du Ciel qui l'a tousiours accompagné & l'accompagnera

tout le long du cours de sa vie. Or c'est de la main
 de ce grand Roy que Monsieur de Sillery a esté es-
 leué en ceste dignité, voila le Prince qui l'a choisi,
 ce qui luy faict autant ou plus estimer & priser la
 bien-veillance que le bien-faict. Comme aussi le
 choix que le Roy a faict de Monsieur de Sillery est
 vn tesmoignage certain du grand soing qu'il a de
 son estat. Car comme il n'y a point de marque plus
 assée de la cheute & ruine prochaine d'un Roy-
 aumé, que de voir les gens de peu auácez aux char-
 ges sans propos, & les gens de bien rebutez sans rai-
 son, & que rien n'empesche tant les hommes ver-
 tueux d'auoir des biens & des hōneurs que les me-
 riter; Aussi n'y a-il meilleur presage ny signe plus
 euident de la conseruation & durée d'un Estat, que
 quand l'on en void les principales & plus grandes
 charges distribuées à ceux qui en sont capables &
 qui s'en sçauent dignement & heureusémēt acqui-
 ter. Les Magistrats & Conseillers d'Estat sont les
 vtils viuans & sentans des Roys & Princes souue-
 rains: que s'ils se trompent en l'eslection qu'ils en
 font, il est nécessaire qu'il y ait du desordre en leurs
 affaires. Le Roy doncques a choisi Monsieur de
 Sillery comme vn personnage accompli & qui a
 toutes les qualitez requises pour manier les affaires
 de son Royaume. Car la vertu dériüée en luy de ses
 ancestres par la descende & continuation de sa ra-
 ce luy est vrayement hereditaire. La maison des
 Brularts est fort noble & fort ancienne: ils sont des-
 cenduz en droicte ligne de Messire Girard Brulart
 Cheualier Baron d'Aguetz, lequel estoit Lieutenant
 d'une compagnie de cent hommes d'armes souz la

charge de l'Admiral de Frâce, & fut tué en la iournée d'Agincour combatant vaillamment pour le seruice de son Roy. Ce feroit chose inutile & à l'auenture ennuieuse de vouloir par la particuliere desduction de ses descendans rehausser la splendeur illustre de ceste maison. Il suffira de vous dire seulement que Monsieur de Sillery a eu cest heur d'estre né fils de Monsieur le President Brulart, de la vertu duquel la memoire est si recente qu'il n'est besoin de s'estendre en discours sur ce subiect. Vous l'avez veu, Messieurs, vous l'avez cogneu, vous l'avez admiré; c'estoit vn grand personnage & vn grand homme de bien, qui en sa vie ne se desuoya du droict sentier de la raison. On voyoit en luy combattre avec pareils aduantages pour le bien de la Iustice, la suffisance & la préud'hommeie, & n'est encore aujourd'huy ce debat vuidé: l'on ne scauroit dire s'il y auoit en luy ou plus de capacité ou plus de probité; bien est-il certain & reconnu de tous que l'vn & l'autre y estoient en si haut degré, que l'humaine nature n'est capable d'ateindre à vne plus grande perfection. Voila le pere de Monsieur de Sillery. Ses ayeul & bisayeul estoient Conseillers en ceste Cour des premiers & plus renommez de leur temps: on les a veu seoir en ceste Grand Chambre pleins d'honneur, autant recommandables pour leur vertu, que pour leur dignité; ils ont esté employés en plusieurs grandes charges & commissions honorables dont ils se sont fort dignement acquizez. Son trisayeul fut honoré par le Roy Loys vnzième des offices de Cōseiller de la Cour & Secrétaire du Roy: l'eslection faicte de sa personne
par

par vn Prince si sage & si aduifé est vn riche tesmoi-
 gnage de sa valeur & de son merite. Monsieur le
 Procureur General Brulart estoit son grand oncle,
 personnage vertueux, graue, constant & sage s'il en
 fut oncques, & dont la vie n'a esté qu'une conti-
 nuelle action & fonction publique pour le seruice
 de son Prince & pour le bien de son pays. Il aimoit
 tant sa charge & la faisoit avec tant d'honneur qu'il
 môstra par effet l'auoir receuë nô pour s'en honorer
 & seruir d'ornemēt, mais s'estre dōné soy-mesme au
 public pour honorer sa charge. Par la successiō de
 tels & si grāds personnages est descēdu en Mōsieur
 de Sillery le desir de suyure la vertu & embrasser
 en son esprit toutes choses grandes & louiābles. En
 quoy se sont prestées la main & ont cōtribué à l'en-
 uy, la noblesse de sa maison, & celle grace attrayāte
 qui reluit en son visage que Platon apelloit le Priui-
 lege de la Nature. L'on y void vne grauité tēperée
 d'une douceur venerable, qui est yne faueur de na-
 ture non petite. Car c'est chose qui a vn grand cre-
 dit au commerce des hommes : il semble que cela
 ait quelque legitime puissāce sur nous, & que tour-
 nāt noz yeux à soy il y tourne aussi noz affectiōs.
 Ces grands aduantages de nature aydez & forti-
 fiez par vne soigneuse institution produisirent aussi-
 tost que la fleur, des fructs de vertu si excellens,
 que dès lors on cōçoit de luy encore ieune enfant
 l'opinion qu'il a tousiours depuis conseruée : Cela
 suiuy d'un continuel trauail, penibles voyages, &
 occupations laborieuses pour le seruice du Roy &
 le bien de ceste Couronne à comme affiné par la
 difficulté & affermy ceste vertu, si qu'elle est parue

auë à la cime de perfectiõ; & par tels degrez a esté
 esleuëe à la supreme dignité de ce Royaume. Ce
 n'a point esté vn prompt & soudain accroissemēt:
 il n'a pas commencé en sa vieillesse à s'entremettre
 des affaires, pour en vn instant changer de vie qu'il
 n'auroit iamais essayée: comme l'on dit qu'Epime-
 nides s'estant allé coucher ieune se resueilla vieil-
 lard cinquante ans apres. Sa vie depuis la plus ten-
 dre ieunesse a esté vn cōtinuel exercice de la vertu:
 il a premierement esté Conseiller en ceste Cour;
 puis President aux Enquestes, & en apres Presidēt
 au Parlement: en la fonction desquelles charges il
 a auec auctorité & vne douce seuerité conserué à
 la Iustice ce beau nom de vierge sacrée que Platon
 luy donna tant à propos. Il s'est tousiours mainte-
 nu net & exempt de ces passions qui perdent, ga-
 stent, & corrompent tout, qui sont vrayement les
 ennemies & meurtrieres des loix & de la raison.
 Le feu Roy ayant recogneu en luy cest esprit no-
 ble, fort & vigoureux, & neantmoins doux, soup-
 ple & moderé, le choisit & l'employa en plusieurs
 charges & negotiations vers le Roy, lors Roy de
 Nauarre, vers plusieurs Princes, Seigneurs, & Cō-
 munautéz: que ie ne m'amuseray à desdire par le
 menu, encore que ces choses heureusement cōdui-
 tes pour le bien de ce Royaume soient en soy fort
 recommandables: mais elles sont cachées, obscur-
 cies & enfoncées soubz la grandeur & le nombre
 infiny de plusieurs autres belles actions qui se pre-
 sentent comme à la foule. Son ambassade aux Suif-
 fes & Grisons, alliez & confederez de ceste Cou-
 ronne est vn seruice fort signalé & qui a produit

des effects tres-importans pour redresser cest estat, dont la cheute & la ruine sembloit lors ineuitable. Le commencement de ceste charge se rencontra avec le cōmencement de noz troubles, qui auoient penetré & s'estoient glisséz parmy ceste nation bel-liqueuse, laquelle se trouuoit lors pour la France aussi diuisée que la France mesme: Ce qui peut le plus sur ceste nation pour la retenir, c'estoit ce qui manquoit le plus: Monsieur de Sillery ne receuoit aucuns moyens de France. Les choses sembloient estre reduites au desespoir. Quand bien il eut cedé au temps & eut calé la voile à la violence de cest orage, il eut eu pour responce à l'accusation l'excuse de la necessité: on ne l'en pouuoit blasmer: mais il pensa qu'à qui cherche de l'honneur, ce n'est pas assez d'euiter le blasme, & que la vertu ne peut paroistre & desployer sa force, que parmy les difficultez, qu'il luy suffisoit d'auoir pour réconfort du peril la grandeur & beauté de la chose entreprise. Il meit la main à l'œuure & traita si heureusemēt qu'il remeit ces peuples & maintint leur deuotiō en general: en sorte que le Roy a esté pendant les troubles seruy des vns & des autres Catholiques & protestans, avec autant d'affection & fidelité que iamais Roy de France ait esté, la France estant bien vnies. Qui fut vne negociation tres-aduantageuse & en effect pour le secours que le Roy en a tiré, qui ne luy a iamais manqué, & pour la reputation que ceste bonne intelligence luy donna enuers les François & enuers les estrangers. Ce bel exploit ne cōuia point Mōsieur de Sillery à se cōtenter de la continuation de sa charge, laquelle en surmontant ces

premieres difficultez il auoit rendu plus aisée & moins penible. Il ne voulut pas laisser cōme fener & seicher la gloire de ceste belle action, ne plus ne moins qu'une Couronne que l'on auroit gagnée. es jeux de prix: ains en produisant quelque nouveau & recent merite s'efforça de resueiller la grace des precedens & la rendre de tant plus grande & plus asseurée. Et de faict s'estant aduisé de la commodité que luy donnoit de seruir son Prince, l'opportunité du lieu où son ambassade l'auoit porté, à cause du voisinage de l'Italie & de l'Allemagne: il traicta pour le Roy avec leurs Princes & Republiques. Ces intelligences secretes par luy conduites avec vne discretion admirable, ont eu à la verité moins d'esclat, d'autant que le secret, l'ame de telles pratiques est ennemy de la renommée: mais elles n'ont pas eu moins d'effect que ce qui paroissoit lors & estoit public à vn chacun, & peut-on dire avec verité qu'il n'y a rien eu, qui ait d'auantage aidé à la restauration de cest Estat. Ces choses luy donnerent vn fort grand nom, mais sa presence à son retour luy en donna encore d'auantage: La verité de la chose en soy surmonta la reputation. Car on le veid orné & enrichy de ceste belle acquisition qu'il auoit faicte par tant de veilles & traux: On vit reluire en luy celle prudence qui est la Royne des autres vertus, la reigle des affaires, la tutrice de nostre felicité, l'ame de l'Estat, & l'esprit qui donne vie, mouuement & action à toutes les autres parties d'iceluy. C'est pourquoy le Roy, lequel avec ceste grande promptitude & excellente viuacité d'esprit dōt il est doué, scait aussi tost recognoistre la valeur

des personnes, l'aima, l'aprocha de foy & s'en seruit à cest œuvre admirable de la reünio de ses subiects & pacification de son Royaume. Ce qui vint fort à propos: sa moderation, douceur & prudēce ne fut iamais tāt de saison. La chaleur des esprits auoit tout gasté, il estoit besoin d'un esprit moderé, maistre de soy-mesme & sans passion pour tout remettre. Car tout ainsi qu'en vn corps naturel malade le commencement de mutation à recouurement de santé, ne luy viēt des membres gastez ny des parties corrompuës, mais quād la temperature des fortes, saines & entieres, est si puissante qu'elle chasse ce qui est en tout le reste du corps contre la nature. Ainsi il fluë & decoule des hommes sages ce qui passe & penetre à trauers de ce qui est malade en vn estat pour luy dōner vne parfaite guarison. Donques le feu de noz troubles s'amortissant peu à peu afin de luy oster la nourriture qui luy venoit de dehors & l'estouffer entierement: il fut besoin de negotier avec les Princes estrangers. Monsieur de Sillery y fut employé & traita tout premierement avec le Duc de Sauoye vne trefue avec cōditions tres-avantageuses pour ce Royaume. Cela donna subiect au Roy de l'enuoyer peu apres en Piedmont vers le mesme Duc, où il negotia si biē & si à propos qu'il iecta les premiers fondemens de la paix, lors autant desesperée que souhaitée. Ce qui en auoit esté cōmencé, fut depuis par luy heureusement continué & paracheué d'une fin glorieuse. Car par son entremise fut concluë entre les deux Couronnes de France & d'Espagne ceste paix tant desirée, de laquelle les fruiets se sont trouuez d'autant plus doux & le

merite de Monsieur de Sillery en ce regard d'autant plus recommandable, que plus est recente la memoire des maux & miseres de la guerre qui nous ont cuidé accabler. Par ce moyen ce Royaume cōme freschement reuenu & releué d'une grande & forte maladie auoit bien recouuré sa santé, mais nō la beauté naïfue de son premier teint. On desiroit encore en luy celle anciēne splēdeur qui luy auoit donné le premier rang entre tous les Royaumes. Pour y paruenir Monsieur de Sillery fut enuoyé Ambassadeur à Rome vers nostre S. Pere le Pape, où il se sceut sagement preualoir de la disposition qu'il trouua en sa Saincteté. Nous auions desia de grādes arres de son affection paternelle, il auoit enuoyé sa benediction au Roy, il auoit d'un soing extreme & cōme vraiment Pere cōmun des Chrestiens auacé les affaires de la Paix. Cōme à la verité c'est vn tres-grād Pape, & duquel la vertu est admirée d'un chacun & la sage preuoyance aduouēe & recognuē par ceux-mesmes qui ne veulent recognoistre son auctorité. Restoit dōques qu'en ceste ville capitale du mōde, en cest auguste siege de l'Eglise où se decident les querelles des Roys & Princes Chresties, en ce souuerain Empire des ames, fut reduē à ce Royaume tres-Chrestien la dignité que noz diuisiōs nourricieres du mespris, auoient sinō perduē du moins grandement raualee. Ce fut en quoy Mōsieur de Sillery employa toute son industrie, & la beauté de ceste action luy ayāt esleué l'ame en vne grandeur & hauteur de courage, il se fit voir aux Estrangers digne ministre du Roy son maistre. Il redressa l'honneur de ceste Couronne auec

celle dextérité. qu'elle a aujourd'huy sur les autres Couronnées presque vn pareil aduantage, que la vertu du Roy a sur les autres Roys du mode. Et cōme en vn cœur genereux l'hōneur d'auoir bien fait est vn éguillon & vn subiect de mieux faire, Monsieur de Sillery ayāt si heureusement releué la dignité de ce Royaume, trauailla à en asseurer la felicité : en quoy Dieu a tellement beny son labeur qu'aujourd'huy l'on la void establie sur tels & si asseurez fondemens, que fil y a rien d'eternel en ce monde, l'on s'en peut promettre vne eternelle durée. Car par le moyen de l'heureux mariage du Roy & de la Royne que Mōsieur de Sillery traicta lors, cest estat qui sembloit encore chancellant s'est affermy, & a prins cōme vne nouuelle vie, ou plüstoſt vne immortalité par la naissance de Mōsieur le Daulphin: ce précieux gage de nostre repos & bon-heur, la ioye du Pere, l'amour du peuple, les delices de la Frāce, l'allegresse des Princes & peuples amis, la terreur & la ruine des ennemis. Or sur le point que ce rāt fortuné mariage se traictoit suruint la guerre de Sauoye qui dura peu, & ne fut que comme vne nuée en vn beau iour, que le Roy cōme vn puissant Soleil dissipa incontinent, & donna aux prieres du Pape le salut de ce Prince prest de porter la peine de sa temerité, & duquel la ruine proche estoit au Roy vn trophée tout asseuré. Le Roy luy octroya la paix qui fut traittée auantageusement par l'entremise de Monsieur de Sillery. Les affaires ainsi establies, ce grād Prince qui a l'œil tousiours ouuert sur le bien & le repos de son peuple, pour le fortifier & luy donner vne fermeté durable, tourna sa pensée à re-

noier & renouueller les alliances de ceste Courō-
 ne mesmemēt auec les ligues des Suisses & Grisons.
 Monsieur de Sillery fut choisi pour cest effect où il
 sceut si dextremēt manier ceste nation puissante &
 voisine, lors aigrie & mal-cōtente, qu'il s'en rendit
 comme le maistre, & par vne douce violence leur
 fit preferer la vertu & la valeur du Roy son maistre
 aux montagnes d'or qui leur estoient offertes par
 les autres Princes. Si que l'alliance fut renouuellée
 auec ces peuples belliqueux, tant pour le regne du
 Roy, que de son successeur, ce qui ne s'estoit iamais
 veu, & outre sont comprins au traicté le Royaume
 de Nauarre & les pays conquis. Depuis Monsieur
 de Sillery a esté continuellement employé pres la
 personne du Roy & a eu la charge & le maniement
 des plus grands & plus importants affaires du Roy-
 aume qu'il a espousé auec vne affectiō incroyable,
 tousiours frais au trauail, iamais las de seruir son
 Prince : & Dieu qui d'un soing plus particulier
 veille sur les hommes d'estat qui ont donné leur vie
 au public a beny ses actions & les a toutes couron-
 nées d'un bon succez & yssuē tres-heureuse. C'est
 pourquoy le Roy ayant recogneu sa fidelité à le
 seruir, son courage à l'entreprendre, sa prudence en
 la conduite, & son bon-heur en l'execution, la cō-
 me i'ay dict honoré de l'office de Garde des Seaux
 de France, ayant à cest effect créé & erigé cest offi-
 ce par les lettres en forme d'Edict qui ont esté pre-
 sentement leuës; sur le reply desquelles il supplie la
 Cour ordōner qu'il sera mis, qu'elles ont esté leuës,
 publiées & registrées.